



Kabarett „Sachsenmeyer & Co.“
09224 Chemnitz
Feenweg 11

Hauptspielstätte:
Kabarett-Kiste (im Hedwigshof)
An der Markthalle 8
09111 Chemnitz

Bestell-Telefon: 0371 - 694 77 11
www.sachsenmeyer-kabarett.de
e-Mail: sachsenmeyer@t-online.de

39. Kalenderwoche – ab 26. September 2010

Gwodnfraun

Ob das werglisch eene guhde Idee is - mähr Fraun in de Vorschdandsedaschn? Ja, es heeßd, mor muss Gwoden machn damid garandierd is, dass mähr Fraun in heehere Bosidsjohnen komm könn. Gwoden...! Naja, das is zum Beischbiel - off zwee Männor eene Frau. Das däde dann eene Gwode sein. Nee, kee floddor Dreior! - das is ja ganz ohne Sex un sowas gemeend. Gwode is einfach, dass off eene beschdimnde Zahl von Männorn eene beschdimmd Zahl von Fraun komm muss. In eim Vorschdand! Also - beischbielsweise drei zu eens. Odor siehm zu eens. In de meisdn Vorschdände so bei Bankn odor in die großn Gonzerne uns so... da soll de agduelle Gwode meisdens bei Soundsoviel zu Null lieschn. Naja, das is ehm, weil sisch dor Mann von Aldors hähr im Beruf durschsedzn muss, damiddor de Sibbe ernähorn kann. Dor Mann had gelernd, wie mor sisch im Beruf hochboxn muss. De Frau dud nisch so sähr boxn. Meine Gudste ooch nisch. Nee, boxn dud die misch nisch. Heeschdens so mid Worde, abor nisch in eschd mid dor Fausd!

Das heeßd, die Männor, die sisch nach ohm hochboxn dun, die machn das ooch nisch mid dor Fausd, ehor mid de Ellbochn odor mid Lisd un Digge. Mansche dun schdadds boxn lieber grieschn.

Das is ehm so. Jedor wie or kann! Wischdisch is ehm, dass du dir als Mann een Bosdn erboxn dusd, dähr genuch einbringd, damid de Sibbe nisch hungorn muss.

Nu, solln also die Fraun, die in de Vorschdände solln, nisch edwa e bißl Boxnachilfe grischn odor Grieschanleitung - damid ses ooch bis nach ohm schaffn dun... nee, die solln einfach hochgehiefd wern. Endschbreschend dor Gwode! Da missn dann ehm irschendwo baar Fraun offgedrieim wern, die de in dähn Vorschdand neinsedzn kannsd, ohne das alle anwähsenden Männor ausreisn odor zu

balzn anfang dun. So eene Sorde Fraun is schwähr zu findn. Ob die werglisch Ahnung ham... fiehr Vorschdand...? - isch gloobe, das is dann egahl - wenn ehm bloß de Gwode schdimm dud!

Guhd, meine Gudste kann isch mir in so mansch eem Vorschdand sähr guhd vorschdelln - die däde offräum mid Faulenzia un Driggedismus! Un direggd zum Balzn däde se die Männor beschdimmd ooch nisch annemiern. Isch meene, se is ehm nisch mähr ganz daufrisch... nach dreißisch Jahre Ehe!

Nee, meine Gudste däde eene guhde Gwodnfrau sein!

Abor mansche Fraun... - ährlich nee! Kansch mir eenfach nisch vorschdelln! Zum Beischbiel im Schwimmbad die Fraun... also, erschdensma komm Fraun ganz seldn alleene. Meisdens komm die in kleenere Rudl zu dridd odor vierd. Un dann dun die nähmnannor hährschwimm... in voller Breede... un dun erzähln. Unendweeschd blabborn die. Du als normalor Schwimmor hasd in dähm Schwimmbeggn keene Schangse mähr, deine Bahn zu ziehn. Die Armada dor Blabborfraun beherrscht das Wassorbeggn. Un wenn isch mir nu vorschdelln du, so e Rudl von Fraun in eim Vorschdand drinne... viere nehmnnannor... die dann unerschiddorlich ihre Bahn ziehn... ohne Riggsischd off annre Schwimmor... - wenn da ma nisch dor ganze Gonzern badn gehn dud!

Eduard Sachsenmeyer